

Headlines

- मुखमंत्रि उमर अब्दुल्ला होरें चसोती च बददल फटने आली घटना मगरा माहिरें दी टीम दा गठन करियै कुदरती आपदाएं दी मार हेठ आई सकने आलें इलाकें दी ताल करने लेई आक्खेया।
- किशतवाड़ च बददल फटने आली घटना च मरने आलें दी गिनतरी 64 होई, राहत ते बचाव अभियान जारी।
- ऊन दे उत्पादन च जम्मू-कश्मीर 25 इशारिया 2-4 फीसद दे योगदान कन्नै मुल्खै च दूई थाहर पर।
- लोकसभा स्पीकर ओम बिरला होरें आक्खेया ऐ जे सदन हून संविधान दी 8मी अनुसूचि च शामिल सब्भनं 22एं भाषाएं च जिन्दे च डोगरी-कश्मीरी बी शामिल न व्याख्या दी सुविधा प्रदान करा रदा ऐ।
- जम्मू-कश्मीर प्रशासन भर्थी नियमें गी अपडेट करने ते सरकारी मैहकमे च विभागीय तरक्की समीतियें दे प्रबंधन दी प्रक्रिया दा डिजिटलीकरण करने दी तयारी करा रदा ऐ।

<><><><><><>

CM Disaster

मुखमंत्रि उमर अब्दुल्ला होरें आक्खेया ऐ जे माहिरें दी इक टीम गी नियुक्त करने दी लोड़ ऐ जेड़ी उनें इलाकें ते थाहरें दा पता लाग जित्थे कुदरती आपदा पेश औने दी मती शैंका होई सकदी ऐ। उन्दा ए ब्यान चसोती च बददल फटने करी होए दे हादसे मगरा आई ऐ। ए ब्यान उनें शेरे-कश्मीर अंतरराष्ट्रीय कन्वेंशन सैन्टर च राष्ट्रीय शिक्षा नीति 2020 पर आयोजित कार्यक्रम दे बाहरे मीडियाकर्मियें कन्नै गल्ल करदे होई दिता। इस मौके पर बोलदे होई मुखमंत्रि होरें किट्टे रलियै आपदा कन्नै निबड़ने दी तयारी करने, कारगर योजना ते जम्मू-कश्मीर च इस पेठा चुनौतियें कन्नै निबड़ने पर जोर पाया।

<><><><><><>

Rescue Op Kishtwar

किश्तवाड़ दे चसौती ग्रां च बद्दल फटने मगरा राहत ते बचाव कम्म युद्ध स्तर पर जारी ऐ। राहत ते बचाव टीमां लापता लोकें गी तुप्पने ते प्रभावित परिवारें गी मदद उपलब्ध कराने गितै लगातार जत्त करा रदियां न। सेना आसेया 5 राहत दल तैनात कीते गे न तां जे चला रदे जतनें च सहयोग दिता जाई सकै।

मौसम दे बेहतर होने कन्नै गै बचाव अभियान नै गति फगड़ी ऐ। बचाव कर्मियें अज्ज उत्थुआं इक होर लोथ बरामद कीती ऐ जेदे कन्नै इस घटना च मरने आले लोकें दी कुल गिनतरी 64 तोड़ी जाई पुज्जी ऐ। कुल 167 लोकें गी बचाया गया ऐ, अजें बी 39 लोक लापता न।

<><><><><><>

Kailash Yatra

किश्तवाड़ ते कठुआ जिलें च हाल च पेश आई दी बददल फटने दियें घटनाएं दे मद्देनजर डोडा दे जिला प्रशासन नै सालाना कैलाश यात्रा पर किश पाबंदी लाई ऐ। ए पाबंदी लोकें दी सुरक्षा दी यकीनी बनाई लेई लाई गेदी ऐ। डोडा दे डिप्टी कमीशनर हरविन्दर सिंह होरें घोषणा कीती ऐ जे छड़े पंजीकृत पुजारियें, होर दुइयां सुविधां उपलब्ध करोआनें आलें ते उनें श्रद्धालुएं गी जिन्दे कश वैद्य पंछान पत्र होगन, उनेंगी गै उत्थे जाने दी इजाजत दिती जाग। कठुआ ते भलेसा दे रस्ते गी इस बरे खराब मौसम दे चलदे बंद कीता गया ऐ। श्रद्धालुएं गी आक्खेया गया ऐ जे ओ सहयोग करन ते दिशा-निर्देशें दी पालना करन।

<><><><><><>

JK Wool

भारत च जम्मू-कश्मीर ऊन दी पैदावार च दूई थाहर पर ऐ। 2023-24 च ऊन दी पैदावार च जम्मू-कश्मीर नै 25 इशारिया 2-4 फीसद योगदान दिता ऐ। एह आंकड़े पशु-पालन मैहकमे आसेया जारी कीते गे न। राजस्थान 45 इशारिया 9-4 फीसद उत्पादन करियै पैहली थाहर पर ऐ। गुजरात-महाराष्ट्र ते हिमाचल-प्रदेश पैहले 5 च शामिल ऐ। ए रिपोर्ट जम्मू-कश्मीर दे भीड़ पालन आले सैक्टर दी भारत दे कपड़ा ते दस्तकारी उद्योग च बढ़ी महत्ता गी दर्शादी ऐ। एदे कन्नै केन्द्र शासत प्रदेश दे हजारों बद्धे परिवारें गी आजीविका बी हासल होआ रदी ऐ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बशकार ऐ ते ओहू जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Languages

लोकसभा स्पीकर ओम बिरला होरें अज्ज सदन गी दस्सेया जे व्याख्या सेवां हूंन संविधान च सूचीबद्ध सब्भनें भाषां च उपलब्ध होगन। उनें आक्खेया जे व्याख्या दियां सुविधां हूंन कश्मीर, कोंकणी ते संथाली च बी उपलब्ध न। उनें दस्सेया जे हुनै तगर डोगरी सनै हिंदी ते अंग्रेजी दे इलावा 18एं भाषां च व्याख्या दियां सुविधां प्रदान कीतियां गेइयां हियां। श्री बिरला होरें जानकारी दिंदे होई आक्खेया जे कश्मीरी, कोंकणी ते संथाली भाषाएं गी जोड़ने दे कन्नै सदन हूंन संविधान दी 8मीं अनुसूचि च शामिल, सब्भनें 22एं भाषाएं च व्याख्या सुविधा प्रदान करा रदा ऐ।

<><><><><><>

C.S Recruitment

जम्मू-कश्मीर प्रशासन, भर्ती नियमें गी अपडेट करने ते सब्भनें सरकारी मैहकमें च विभागीय तरक्की समीतियें दे प्रबंधन दी प्रक्रिया दा डिजिटलीकरण ते सरल बनाने दी तयारी करा रदा ऐ। मुख सचिव अटल डुल्लु होरें जोर देइयै आक्खेया ऐ जे मनुक्खी संसाधन आहली चुनौतियें कन्नै निबड़ना, होरनें प्रशासनिक प्राथमिकताएं आहंगर गै महत्वपूर्ण ऐ, कीजे एहदे च चिर,

मुलाजिमें दे मनोबल पर नकारात्मक असर पाई सकदा ऐ। उनें बाईसैग-एन गी वास्तविक समें, पारदर्शी ते कुशल प्रसंस्करण दी सुविधा आस्तै इक आई.टी. आधारत पोर्टल बनाने दी जरूरता पर जोर पाया। लोक-निर्माण मैहकमे दे प्रधान सचिव हुंदी प्रधानता च इक समीति इस प्रणाली गी लागू करने आस्तै जिम्मेवार होग। अधिकारियें दे कौशल गी बधाने ते एह निश्चित करने आस्तै प्रशिक्षण कार्यक्रम आयोजित कीते जागंन, जेहड़े मुलाजिमें लेई फायदेमंद साबित होगंन।

<><><><><><>

Khelo India Water Sports

जम्मू-कश्मीर च खेडुं दा इक बड्डा उत्सव शुरु होने आहला ऐ कीजे केंद्र शासत प्रदेश श्रीनगर दी मशहूर डल-झील पर 21 शा 23 अगस्त तगर होने आहले “खेलो इंडिया वाटर स्पोर्ट्स फेस्टिवल-2025” दी त्त्यारी करा रदा ऐ। तकरीबन 800 एथलीट, कयाकिंग, कैनोइंग ते रौइंग जनेहियें खेडुं च मकाबला करगंन। इस कार्यक्रम दा आयोजन जम्मू-कश्मीर खेड्डू परिषद ते युवा मामलें दे मंत्रालय आसेया कीता जा रदा ऐ ते एहू खेतर दे सैलसफा, संस्कृति ते दस्तकारी गी बी इक मंच प्रदान करौग।

<><><><><><>

Bachh Dua

रिवायती डुग्गर तेहार बछ-दुआ अज्ज पूरे जम्मू खिते च बड़े गै धार्मिक उत्साह कन्नै मनाया गया। मती भारी गिनतरी च महिलां पवित्तर अनुष्ठान करने ते प्रार्थना करने आस्तै जल स्रोतें पर किट्टियां होइयां। इस मौके पर महिलायें सदियें परानी परम्पराएं गी मनाया ते अपने पुत्तरें दी लम्मी बरेसु ते भलाई दी प्रार्थना कीती। बछ-दुआ डोगरा बरादरी दा इक महत्वपूर्ण लोक तेहार ऐ, जेडा इस खेतर दी सगोसार-सांस्कृतिक वरासत ते परोआरें दे डूंहगे मुल्लें, बशेष रुपै कन्नै माताएं ते उन्दे ज्याणें दे बिच्च पवित्तर बंधन गी दर्शादा ऐ।

<><><><><><>